

Immiaaqqat imeruusaatillu kulsyrimik akullit puui pillugit Namminersorlutik Oqartussat nalunaarutaat nr. 16, 25. oktober 2019-imeersoq

Avatangiisit innarlitsaaliorneqarnissaanik Inatsisartut inatsisaanni nr. 9-mi, 22. november 2011-meersumi § 10, imm. 1, nr. 11 aamma § 66, imm. 1, imm. 3 naapertorlugit aalajangersarneqarput:

Nassuiaatit

§ 1. Nalunaarummi matumani immiaaqqat pineqartut tassaapput imeruusaatit ethanol-imik akullit aammalu suliarineqarnerminni malt, humle mamarsaataasinnaasullu imermut akulerullugit qappiortinneqarsimasut pineqarput.

Imm. 2. Nalunaarummi matumani imeruusaatit kulsyrimik akullit pineqartut tassaapput imeruusaatit imermi namminerisaminnik imaluunniit akuliunneqartumik kuldioxid-itallit, aammalu tungusunnissaatinik mamarsaatinillu akuneqarsimasinnaasut, kisiannili ethanol-imik akuneqarsimangitsut pineqarput.

Imm. 3. Nalunaarummi matumani poortuutit utertittakkat pineqartut tassaapput poortuutit, utertitsisarnermut ilaatinneqartut, tassanilu poortuutit amerlanersaat atuisunit imarneqareernerminni immeqqitassanngorlugit utertinneqartarput.

Imm. 4. Nalunaarummi matumani poortuutit ataasiaannarluni atortakkanik utertitsisarnermi pineqartoq tassaavoq poortuunik utertitsisarneq, poortuutit atuisunit imarneqareernerini niuertarfimmut, atortut atoqqitassanngorlugit utertinneqartarnissaannik qulakkeerisussamut utertinneqartarnissaannik qulakkeeriviusoq.

Utertitsisarnerit

§ 2. Immiaaqqat imeruusaatillu kulsyrimik akullit taamaallaat nalunaarummut uunga ilanngussami immikkut nalunaarsukkanik eqqortitsisunik utertittakkanik pooqartillugit tuniniarneqarsinnaapput.

§ 3. Immiaaqqat imeruusaatillu kulsyrimik akullit taamaallaat utertitsisarnermut, Naalakkersuisut akuerisaannut ilaatinneqarsinnaasunik ataasiarluni atorneqarsinnaasunik pooqartillugit tuniniarneqarsinnaapput.

§ 4. Immiaaqqat maqittakkat, atuisunut sassaalliutissatut neriniartarfinnut, akunnittarfinnut sassaallertarfinnullu tunineqartut taamaallaat nappartaaqqanut, § 1, imm. 3 imaluunniit imm. 4 naapertorlugit utertitsisarnermut, Naalackersuisut akuerisaannut ilaatinneqarsinnaasunik poqartillugit tuniniarneqarsinnaapput.

§ 5. Immiaaqqat literimut ethanol-imik 0,5 procentimik minnerusumilluunniit akullit §§ 2-4-mut ilaatinneqanngillat.

Imm. 2. Poortuutissaq, § 2 naapertorlugu puukutut utertitassatut akuerisaasoq, imaluunniit § 3 imaluunniit § 4 naapertorlugu utertitsisarnermut ilaatinneqarsinnaasoq immiaaqqat imeruusaatillu kulsyrimik akullit, imaluunniit immiaaqqat imm. 1-imut ilaatinneqartut saniatigut imeruusaatinut allanut atorneqassappat, atuisussamut kingullermut tunisinermi poortuutissap akilersinneqartussap, poortuutissap immiaaqqamut imeruusaammullu kulsyrimik akullip atorneqartup annertoqataata utertinneqarnissaanut akiliisitsisoqassaaq.

§ 6. Kinaluunniit immiaaqqanik imeruusaatinillu kulsyrimik akulinnik sunilluunniit tuniniagaqartoq suut poorineqarnerannik, puukunik utertitsisarnerup qanoq ingerlaneranik, tassungalu ilanngullugu puukut utertinneqartartut procentit qassiunerinik aamma puukut utertinneqartut qanoq akilerneqartarnerinik Naalackersuisut piumasaqarnerisigut paasissutissiinissamut aammalu poorineqartunut misiligutinik tunniussinissaminut pisussaaffeqarpoq.

Imm. 2. Avatangiisit mingutsinneqannginnissaat aamma eqqaavilerisut pisariaqanngitsumik persaqusersorneqannginnissaat suusupagineqarsimasut paasineqarpat, Naalackersuisut puukut utertinneqartut qanoq akilerneqartarnissaat aamma puukunik utertitsisarnermi periaaseq pillugit immikkut piumasaqaatinik aalajangersaasinnaapput.

§ 7. Immiaaqqat imeruusaatillu kulsyrimik akullit, nalunaarummut ilanngussami immikkut nalunaarsukkanik naammassinniffiunngitsunik puullit Kalaallit Nunaata kitaani tuniniarneqarsinnaanissaannut Naalackersuisut akuersisinnaapput, tamanna pilersuineri ajornakusoortitsinerimik pissuteqarpat imaluunniit tuniniarneqartut ataasiakkaat amerlanngippata. Naalackersuisut utertitsisarnermik, poortuutissat atoqqitassanngorlugit utertinneqarsinnaanerintut qulakkeeriviusumik pilersitsinissamut piumasaqaatinik aalajangersaasinnaapput.

Nakutilliineq pineqaatissiisarnerlu

§ 8. Nalunaarummi matumani maleruagassat malinneqarnerannut kommunalbestyrelsi nakkutilliisuvoq.

Imm. 2. Poortuutissanik nalunaarummik malinniffiunngitsunik piiaanissamut kommunalbestyrelsi peqqusisinnaavoq.

Imm. 3. Aammattaaq nakkutilliinermut atuutsitsinermullu avatangiisit innarlitsaaliorneqarnissaanik Inatsisartut inatsisaanni kapitali 12-imi maleruagassat atuutsinneqarput.

§ 9. Nalunaarut manna naapertorlugu aalajangiinerit tamarmik avatangiisit innarlitsaaliorneqarnissaanik Inatsisartut inatsisaanni kapitali 14-imi maleruagassat naapertorlugit maalaarutigineqarsinnaapput.

§ 10. §§ 2-4-mik, § 5, imm. 2 aamma § 6, imm. 1-imi unioqutitsinermit akiligassanngortitsisoqarsinnaavoq. Tamannattaaq § 6, imm. 2, § 7 aamma § 8, imm. 2 naapertorlugu piunasaqaatinik peqqussutinillu unioqutitsinermut atuuppoq.

Imm. 2. Ingerlatseqatigiiffiit il.il. (suliffeqarfiit) Kalaallit Nunaannut pinerluttulerinermut inatsimmi kapitali 5-imi maleruagassat naapertorlugit akiliisussanngortinneqarsinnaapput.

Atuutsitsilernermit, atorunnaarsitsinermut naalagaaffiullu immikkoortanut aalajangersakkat

§ 11. Nalunaarut ullup saqqummiunneqarfimmi aqaguani atuutilissaaq.

Imm. 2. Tamatuma peqatigisaanik immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaat nr. 16, 28. maj 2002-meersoq atorunnaarsinneqarpoq.

§ 12. Nalunaarut sakkutooqarfimmut Pituffimmiittumut atuutinngilaq.

Namminersorlutik Oqartussat, ulloq 25. oktober 2019

Kim Kielsen

/

Mette Skarregaard Pedersen